

nomine nostro et pro nobis suscipiendi et recipiendi et nos ad earum satisfaccionem, execucionem et totalem perfectionem et observanciam obligandi, prout vestra sanctitas nobis duxerit iniungendum, necnon veniam, gratiam et misericordiam a sanctitate vestra super commissis a nobis petendi et humiliter impetrandi; absolucionem eciam petendi super omnibus et singulis sentenciis iuris vel hominis, quas incurrimus ex causis vel factis quibuscumque, supplicandi quoque pro abolicione omnis effectus processus et sentenciarum per predictum dominum Iohannem papam XXII. vel alios quoscumque contra nos prolatorum, factorum et promulgatorum.

Item predictis nostris procuratoribus omnibus et unicuique ipsorum in solidum ut supra damus et concedimus sponte et ex certa sciencia plenam, meram et liberam potestatem, auctoritatem et speciale mandatum, vice et nomine nostro titulum imperialem, quem Rome recepimus et quo hucusque sumus usi, dimittendi et deponendi ipsumque perverse, male et iniuste per nos fuisse receptum asserendi et confitendi publice singulariter et private, prout vestre placebit sanctitati, et promittendi eciam, quod eodem ulterius non utemur; et cum hoc supplicandi pro assumptione nostra in regem Romanorum et approbacione persone nostre ad imperialem dignitatem promovende. Item supplicandi pro assumptione nostra ad famam et honorem et restitutione ad statum, in quo eramus ante sentencias et processus per predictum dominum quondam papam Iohannem contra nos promulgatos.

Item omnia et singula iuramenta sive de stando, obediendo et parendo mandatis ecclesie sive de excessibus per nos commissis per prefatos nostros procuratores omnes, aliquos vel aliquem eorum confessatis ulterius non committendis et de universis et singulis hereticis et scismaticis pro nostra possibilitate extirpandis necnon iuramenta singula et omnia per dive recordacionis dominum Heinricum imperatorem ultimum et alios imperatores et Roman(orum) reges facta et prestita et quecumque alia iuramenta, que per nos prestanda sunt vel prestari debent, vice et nomine nostro et pro nobis et in animam nostram prestandi, iurandi et eciam faciendi et que sanctitati vestre prestanda videbuntur.

Item supplicandi pro absolucione excommunicacionis, interdicti et irregularitatis singularium personarum clericorum et laicorum in quocumque casu existant necnon pro relaxacione interdicti et interdictorum quorumcumque ex facto nostro seu occasione nostra in ecclesias